

Galatia

Anutuŋeâk Paulo aposolo âigât waŋdo meminep.

1 ¹⁻²O galalupne, hân kotŋe Galatia aregât ambolupŋe ye âmâ emelâk biwiyeŋe Yesugâlân katmâ menduguyi aregât kulem esenŋe ire katyeŋgire togoâp. Nâ Paulo, akto Yesugât kâmot nâ olop manmaen nenŋe kulem ire katyeŋgienŋe togoâp. Akto nâŋe Yesu Kristogât âi aposolo ire âmâ luâk siâŋe bo katnegep. Yesu Kristo akto Eweŋe Anutuŋe Yesu momoŋânba goaŋdo agalep yâkŋe nâ âi ire niŋiat. Aregâlâk lâuwâŋe maktere nâŋgâŋet. Luâk siâŋe makniŋdo âi ire bo meman. Bo. Anutu akto Yesu yâkŋe tân nugumbela yâk yetgât hoŋ bawa manman. Aregât den ire makyenŋiwerâm aktân. ³Ewenenŋe Anutu akto Humonenŋe Yesu Kristo yâkŋe han kalem akmâ damunyeŋe akbela han kalem akto lumbe yeŋgâlân hâtikom yendo biwiyeŋe sândugewiâp. ⁴Akto Anutu Ewenenŋande han nâŋgâ nâŋgâŋaet bunŋe makto Yesuŋe lauŋe lokom nengât akmâ hâu nenŋe mem moep. Eweŋaet lauŋe lokom gembo kombiâ mondo dosanenŋe bo agep. Akto Yesuŋe nengât hin magep, “Nâŋgât kâmot hâmbâi miawakbai are gasalupyenŋande bâleŋe akyenŋiwâi dâm Eweŋaet lau lokom menekŋet.” dâm kindo mem kombiâ moep aregât wan me wan bâleŋande hilip nenguwiapgât dop bo tatâp. ⁵Aregât nenŋe sop ârândâŋâk kotŋe mem agatmâ manmâ âgâwaen. A bundâk.

Den pat âlepŋe konogâk tatâp.

⁶Galalupne, yeŋgât den pat nâŋgâm biwine bâliâp aregât den metŋe makyenŋire nâŋgâŋet. Anutuŋe yeŋgât okotŋe nâŋgâm makyenŋimbo biwiyeŋe Yesugâlân kali are dowâk hâkâŋ akmâ biwiyeŋe siâgâlân katberâm aktâi me? Hain akberâmbiâ nâŋgâre biwine dondâ bâliâp. ⁷Ye gain gain akmâ biwiyeŋe siâgâlân katberâm aktâi? Yesugât den pat âlepŋe are konok yendâp aregât siâgâlân biwiyeŋe katbai aregât dâp bo tatâp. Gârâmâ siâŋe Yesugât den pat gulip agâk dâm akto luâk biwiyeŋe Yesugâlân kali areyeŋgât biwiyeŋe gulip agâk dâm den pat aŋgâ makyenŋimbo are bo nâŋgâwei. ⁸Akto aregât hin dân. Nengâlân gâtŋe

siâne nengât den hainâk bo lokom âmâ den irakne makyengiwiap aregât Anutuje hilipkoâk dâwe. Akto Anutugât hoj bawa dâp pânân manmai kotyeje aņelo areyengâlân gâtje siâne me luâk siâne me nengâlânba luâk siâne den emelâk nânġâyi hainâk bo mem âmâ den irakne makyengimbo âmâ aregât hin dâman. Anutuje hilipkombo hemem kâlâwân geâk dâman. ⁹Den ulikjân magion areâk gaetje ire maktân. Niġande pat âlep den hekatyeņgiep a hilipkom aņġâ siâ makyengiwiap yâk hememgât pat akbiap. ¹⁰Galama, nâmâ luâkneak nekjet hain dâman me Anutuje nekto huraguâk dâm akman mon? Akto nâne luâkne kotne mem agatjet dâman dâine Yesugât den pat âlepne makyengiman aregât âi emelâk hepunbom.

Paulo ikiġaet akmâ miep aregât pat.

¹¹O galalupne, nunaet pat are makyengire nânġânet. Ulikjân den pat âlepne makyengire nânġâyi are âmâ luâk siâne ikiġaet nânġâ nânġânân bo makniņdo makyengiân. Bo kârikne. ¹²Amâ luâk siâne siâ bo makmâ hekatniņep. Yesu Kristoje ikiġak miawakto ektere ainâk den pat âlepne aregât keiņe makniņep. ¹³⁻¹⁴Akto nânġât pat ulikjân aġân are emelâk nânġâyi. Amâ hin aġân. Nâne Anutugât kotje mem agatbe dâm Yuda nengât agak meme watmâ aġân. Hain akmâ Yuda luâk hutyeņânba luâk kâmne hârok nâne bâgilupnenne yengât agak meme are hârok memberâm kârikne dondâ akmâ ewangiyeġân. Aregât luâk âmbâle biwiyeņe Yesugâlân kali bikne mem hilipyenġuân. Akto Anutugât kâmot Yesuje damunyeņe akmap are hârok bo akjet dâm âi humo meân. ¹⁵Dâ nâmâ ulikjân memenande boâk menektoân Anutuje, “Gâ nânġât dâtâne.” dâm makmâ hâreniņep arekne ikiġak okot âlepgât nâ humo aktere ain hanne mem purigep. ¹⁶Hain akmâ ikiġaet nanne Yesu are hekatniņmâ hin dâm makniņep, “Gâ nânġât nanne iregât den pat âlepne are Yuda luâk âmbâle bo are makyengiwiat.” dâep. Hain dâmbo aregât sop ain âmâ nâne luâk bikne bo aiyenġuân. ¹⁷Akto Yesugât aposoloje soj Yerusalem kipian mali are bo aiyenġuân. Anutuje âi keiņe hekatniņmâ aposologât âi niņep aregât yânâk Arabia hânân arim tatmâ benne arewa purik katmâ Damasko kipian ari malân.

¹⁸Ain manmâ hombaņ âlâwu bo akto âmâ Petoro ekberâm Yerusalem kipian arim Petoro olop tatmâ den dât magaņgi goaņgi akmâ tatetje hilâm 15 bo agep. ¹⁹Sop ain Petoro akto Humo nenġaet emiņe Yakobo areâk yelegân. ²⁰Amâ nâmâ bunneâk makman aregât Anutuje nânġâmap. ²¹Akto aregât siâkâ makbe. Nâ Petoro hepunmâ ainâk hân kotje Siria akto hân kotje Kilikia ain arim malân. ²²Akto Yesugât kâmot Yudaiagen manmai yâkne bo nânġâniņmini. ²³Yâkne nânġât den pat hin amâ nânġâyi, “Nengum watnenekmâ den bunne gâlîkoâkgât magepne hinne Yesugât keiņe makyengim manmap.” ²⁴Hain nânġâm Anutugât kotje mem agali.

Pauloŋe Yerusalem âgâmbô Aposolo bikŋe olop biwi konok agi.

2 ¹Akto arewa nâ hân siân siân arim mandere hombanŋe 14 bo akto ainâk Anutuŋe miawakniŋmâ hin makniŋep, “Yerusalem kipian ariwen.” dâmbô Banaba akto Tito olop Yerusalem kipian ariyion. ²Ain arienŋe humomoâk mendugumbiâ yân manbomgât Yuda luâk âmbâle bo manmai are makyenŋiman are bundâk me bo dâm makyenŋire nânŋâmbiâ bunŋe agep. ³Nânŋâmbiâ bunŋe akto Yuda luâk bo are hâkyeŋe gâmbiâ Anutuŋe yekto ârândân akbiap aregât keiŋe bo makniŋi. Akto galane Tito yâk âmâ Girik hânân gâtŋe aregât hâkŋe gâi gâigât bo maganŋi. ⁴Akto sop ainâk luâk bikŋe bâleŋe aknengiwerâm Yerusalem kipian yoŋâk âgâm nengâlân yaiwâk penânengiŋi arekŋe, “Yesu Kristogât kâmotŋe Mosegât den lokoŋe Anutuŋe nenekmâ luâk âlepŋe dâwiap dâm hain bo makmai are makyenŋienŋe Mosegât den lokom biwiyeŋe aregâlâk nânŋâŋet.” dâm penânengim umatŋe kaknennân katberâm agi. ⁵Luâk bâleŋe arekŋe hain dâm hâwât nenekbiâ nenâmâ bo dâm Yuda luâk bo are den pat âlepŋe nânŋâmbiâ biwiyeŋe owâiâk dâm luâk bâleŋe yeŋgât den are bo nânŋâyion. ⁶Akto Yesugât kâmot arekŋe Yakobo, Petoŋe akto Yohane yâkŋe nengât humomolupnenŋe dâm yeŋgonli yâk Anutuŋe biwiyeŋân ekmap arekŋe nânŋgât den bo koyi. Akto humomolupnenŋe dâm yekmai are yektere humo bo akmap. ⁷⁻⁸Hain akmâ Anutuŋe den pat âlepŋe Yuda luâk bo are makyenŋiwen dâm makniŋep aregât pat makyenŋire nânŋâm, “Woe, Anutuŋe Petoŋe Yuda luâk âmbâle are den pat âlepŋe makyenŋiwen dâm maganŋmâ tângomap yâkŋe hainâk Paulo Yuda luâk âmbâle bo manmai are makyenŋiwen dâm aregât tângomap.” dâm nânŋâmbiâ bunŋe akto den bikŋe siâ bo dewatiŋi. ⁹Akto Kembuŋe âi niŋep are Yakobo Petoŋe akto Yohane yâkŋe Yesugât kâmot yâk yeŋgât tân maliŋe nânŋâm kotgâm nâ akto Banaba gala menelekmâ bânnetŋe koyi. Akto net Anutu bonânŋanmai yâk yeŋgâlân âi mendetŋe yâk yeŋak Yuda luâk tiripdâ yâk yeŋgâlân arim makne dâm magi. ¹⁰“Akto den konogâk tatâp are nânŋâet. Yuda luâk âmbâle umburuk aregât bo nelâm yetkiwiap.” dâm maknetkimbiâ Yuda luâk âmbâle umburuk mali areyeŋgât okot âlep akyenŋimaet aregât âlepŋe dâyiŋot.

Petoŋe âi mem hilipkoep a Pauloŋe nânŋâmbô bo huraguep.

¹¹Akto hilâm siân Petoŋe Antiokia kipian togom manmâ âmâ agak meme bâleŋe akmâ hilipkombo den meteŋe maganŋân. Amâ hin. ¹²Ulikŋân Yuda luâk âmbâle bo manmai are penâyeŋgimbo olop mali. Ainba Yakobogât galalupŋande âkâ hainâk Antiokia kipian togombiâ Petoŋe hâk gâi aŋŋiŋet dâmai are yeŋgât hamep akmâ Yuda luâk âmbâle bo manmai are hepunyekmâ Yakobogât galalupŋe are penâyeŋgiep.

¹³Petoroŋe hain akto aregât Yuda luâk âmbâle bikŋande hainâk akmâ Yuda luâk âmbâle bo manmai are hepunyegi. Akto sop ain Banabaŋe galalupŋande Yuda luâk âmbâle penâyengiŋi are yekmâ hainâk Yuda luâk âmbâle bo manmai are hepunyegep. ¹⁴Akto pat âlep dengât dâp ârândân bo tâlimbiâ yekmâ luâk bikŋe yâk yeŋgât dewunyeŋân Petoro hin magañân, “Gâ Yuda luâk nenjaet agak memeân bo akminen. Anutu bo nânŋaŋmai yâk yeŋgât agak memeân akmenâ ârândân agep. Dâ hinŋe Yuda gâtŋe bo are Yuda nengât agak memeân akŋetgât makmenâ âmâ bo ârândân aktâp. ¹⁵Nen Yuda hânân gâtŋe nenŋe âmâ ulikŋân Mosegât den kârikŋe lokoenŋe Anutuŋe luâk âlepŋe dâm nengolâk aregât Yuda luâk bo are yekmâ luâk bâleŋe dâm yeŋgonminion. ¹⁶Gârâmâ hinŋe nânŋâ nânŋâ irakŋe mem âmâ nen den kârikŋe lokoenŋe Anutuŋe nenekmâ luâk âlepŋe dâm nengonbiap aregât dâp bo tatâp. Bo. Yesu Kristo nânŋaŋdenŋe amâ dosa bâlâkgât pat miawaknengiwiap, a nânŋâmaen. Aregât nen biwinenŋe Yesu Kristogâlân katenŋe Anutuŋe nenekmâ, “Nannande dumyeŋân kinlep aregât dosayeŋe bo agep.” dâep.”

**Yesuŋe moepgât Paulokâ hainâk manmanŋe
hepunmâ momogât dâp agep.**

¹⁷Dâ Kristogâlân dewatim mandenŋe Anutuŋe nenekto huraguâkgât mannegât bâleŋe nenŋe miawakmap. Aregât gain gain dâwaen? Are Kristoŋe hâwât nenekto bâleŋe akmaen mon? Bo. Hain bo tatâp. ¹⁸Wan me wan bâleŋerâm hâkân akmâ hepulân are gaetŋe lâuwâŋe mem gangerâm manbian amâ bundâk nâ den koko luâk akbian. ¹⁹Dâ den kârikŋe Moseŋe kulengoep arekŋe nugumbo mondere den kârikŋande lâuwâŋe bo damunne agep. Are Anutu manañberâm agân. ²⁰Hain akmâ Anutuŋe nanŋe huŋŋunaŋdo gem nânŋgât dumnân kinmâ moep aregât nâ momogât dop agân a nunaet akmâ bo. Kristoŋe biwinân manmap hâk olop manman. Hain akmâ Anutugât nanŋe nânŋaŋmâ yâkgâlâk manman. Yâkŋe âmâ han kalem akniŋmâ manmanŋe nânŋgât akmâ hepunmâ moepgât. ²¹Aregât hin nânŋân. Den kârikŋe lokoenŋe luâk âlepŋe dâm nengonbiapgât dop tatâp dâine Yesu Kristo moep aregât den are yânŋe akbop are nânŋân. Akto Anutuŋe nanŋe damun nenŋe akbiap dâm huŋŋunaŋep pat are nânŋâm hilipkowom.

Biwinenŋe Anutugâlân katenŋe Anutuŋe nenekto huragumap.

3 ¹O galalupne, Galatia hânân gâtŋe ye ulikŋân Yesu Kristo moep aregât pat makyenŋire nânŋgâm meteyiân ainâk den pat are dowâk nânŋâmbiâ biwiyeŋân gem kârikŋe agep. Dâ hinŋe âmâ niŋande biwiyeŋe mem gulip milip mânŋiyegep? ²Aregât hin aiyenŋuwe. Yeŋe den kârikŋe lokombiâ Anutuŋe ikiŋaet Heakŋe yeŋgiep me den pat âlepŋe makyenŋire dowâk biwiyeŋe Yesugâlân katbiâ ainâk Anutuŋe

ikiŋaet Heakŋe yengiep mon? ³Aregât wangât yeŋe kârikŋe yeŋe watmâ aregâlân biwiyeŋe katâi? Dâ Anutugât Heakŋe yâkgât kârikŋande ulikŋân tânyengumbo mali aregât hinŋe manman tâmbâŋaet dâwân ariwai me? ⁴Wan me wan humo are yân hanâk miawakyengiep mon? Bo. ⁵Are lâuwâŋe makbe. Luâk âmbâleŋe den kârikŋe lokombiâ Anutuŋe ikiŋaet Heakŋe huŋgunanŋdo meme akyengimbo kulem siâ siâ akmai me bo? Bo. Nenŋe biwinenŋe Yesugâlân katenŋe Anutuŋe ikiŋaet Heakŋe âlepŋe huŋgun anŋdo kârikŋe nengimbo kulem siâ siâ memaen.

Abraham Anutu nânŋanŋdo kârikŋe agep.

⁶Abrahamŋe Anutuŋe den bunŋe maktâp dâm kambiamŋe âlepŋe akto biwiŋe Humogâlân kato âmâ Anutuŋe dosage bo aktâp dâm konlep. ⁷Aregât hainâk nen âkâ biwinenŋe Anutugâlân katenŋe Anutuŋe nenekmâ Abrahamgât kâmot dâm nengonbiap. ⁸Akto aregât siâkâ makbe. Anutugât denŋande siân Yuda luâk âmbâle bo manmai areyengâlân gâtŋe bikŋande biwiyeŋe nannaelân katbiâ dosayeŋe bo tatyeŋgiâp dâwian dâm aregât Abraham hin maganŋep, “Siân gâŋgât kâmolân gâtŋe konok miawakbiap sop ain âmâ luâk âmbâle hân biken biken manbai are hârok tân yeŋgumbo heronŋe akbai.” ⁹Aregât nen hin nânŋâmaen, “Biwinenŋe Anutugâlân katmaen nenŋe âmâ Abrahamŋe Anutu lau lokoanŋminep yâkgât kâmolân mandenŋe Anutuŋe tân nenguwiap.” hain nânŋâmaen.

Yesu nengât akmâ sait den bâleŋe kakŋân âgâep.

¹⁰Akto Moseŋe kulemgoep bikŋe hin tatâp, “Luâk âmbâle den kârikŋe hârok bo lokowai yâk Anutuŋe kuk akyengimbo bâliwai.” hain tatâp. Aregât den kârikŋaet âiŋande tânyengumbo manbai yâk âmâ sait membai. ¹¹Akto luâk âmbâle bikŋe biwiyeŋe Anutugâlân katbiâ tânyengumbo manman âlepŋân manbai a nânŋâmaen aregât den kârikŋe kâlegen manmâ Anutugâlân dosa bâlâk akbaengât bo tatâp. ¹²Den kârikŋe denân amâ biwi kat katgât keiŋe bo. Amâ hin magep, “Luâk âmbâle bikŋe den kârikŋe lokowai yâk âmâ manman âlepŋân manbai.” ¹³Anutugât denŋande hin dâep, “Luâk siâ lâwin parâŋân hokatbiâ kinbiap are Anutuŋe sait bâleŋe kakŋân katbiap.” Aregât Kristo nengât hain are akmâ sait bâleŋe miep. Mem âmâ den kârikŋaet sait are mem nengâlân togowopgât gulip koep. ¹⁴Hain akmâ Anutuŋe Abrahamgât makmâ hâriep are Yuda luâk bo manmai yâk yeŋgâlân ariwiapgât moep. Akto nen Yesu nânŋanŋdenŋe Anutuŋe ikiŋe wâtgât meme Heak are makmâ hâriep are nengâlân togowiapgât moep.

Den kârikŋande amâ bât samulânba bo hâkokonenekbiap.

¹⁵Galalupne, nengât agak meme âmâ hin. Luâk siânŋe den makmâ kalep aregât siânŋe den are dewatim katbiap me bikŋe hârewiapgât dop bo tatâp.

Borondâ. ¹⁶Akto Anutuŋe bāt samut are Abraham akto hakuŋe siāgāt magep. Akto Anutuġāt den kulemŋe amâ kâlelupŋe biwirâ yâk yeŋgāt bo magep. Konokġāt magep amâ Kristo are. ¹⁷Akto Anutuŋe den makmâ kalewânbak hombaŋ 430 bo akto ainâk Anutuŋe den kârikŋe makto Moseŋe kulemgoep. Den kârikŋe arekŋe Anutuŋe Abraham magaŋdo den makmâ kalep are mem ge katbiapgāt dop bo tatâp. ¹⁸Aregāt lâuwâŋe makbe. Anutuŋe, “Gâ den kârikŋe lokowiat âmâ gâ akto gâŋgāt kâmolân gâtŋe siâ wan me wan yetkiwian.” dâep dâine benŋe Anutuŋe den lumbe are bo makmâ katbop. Gârâmâ Anutuŋe Abraham yân âi bo miepgāt den lumbe makmâ hâriep.

Anutuġāt den kârikŋande dosanenŋe tekteŋjân kalep.

¹⁹Wei, Mosegāt den kârikŋande amâ wangāt dâmap? Hingāt. Anutuŋe luâk âmbâle nengāt agak memenenŋe bâleŋe miawagâġgāt den kârikŋe kalep. Gârâmâ den are tatmâ âġâwiapgāt dop bo tatâp. Abrahamgāt kâlegen den pat Amboŋe miawakto hulaŋ akmâ ariâġgāt makmâ kalep. Akto den kârikŋe are amâ aŋelo lauŋe makmakġāt miawagep. Akto yân bo. Luâk mendugunenekmapŋe bâtrjân mem katnenegep. ²⁰Dâ mendugunenekmap luâk yâk amâ luâk konokġāt bo akmâ manmap. Biwirâ nengāt akmâ manmap. Dâ Anutu amâ konok. ²¹Akto den kârikŋe arekŋe Anutuġāt pat âlep den mem ge katmâ hâlâŋmâ aŋgâ miawakbiap mon? Hain bo. Den kârikŋe arekŋe luâk biwi golâ mânġinenekmap dâine âmâ bundâk den kârikŋe lokoenŋe dosa bâlâk agak meme are miawaknengiwoep. ²²Gârâmâ Anutuġāt denŋande luâk hârokŋe bâleŋaet tâġân dâġâm gisap konenekmap. Amâ hingāt. Anutuŋe Yesu Kristogāt akmâ luâk âmbâle bikŋe Yesu nânġaŋmai aregāt makmâ hâriep den are bunŋe agâġgāt. Amâ nen Yesu nânġaŋmaengāt. ²³Dâ Yesu bo nânġaŋmâ kepilâyionân âmâ nen Yuda luâk are den kârikŋande hikonenekto tâġân yem mandenŋe Yesu nânġaŋmâ manbaengāt patŋande miawakmâ tek tegiep. ²⁴Akto aregāt den kârikŋande damunnenŋe akmâ Kristogâlân katnenegep. Arekŋe Yesu nânġaŋmâ dosa bâlâk manbaengāt hain aknengiep. ²⁵Dâ nen biwi kat katgāt dâp miawakto are tâlienŋe miwindik nenekmapgāt tâk togep. ²⁶Amâ ye hârok Yesu Kristo nânġaŋmaigāt hârok Anutuġāt nan baratluŋe agi mandâi. ²⁷Akto tu puliyegiân âmâ Kristogâlân dewatiyi. Ye hârokŋe Kristo luguakmâ lugumbiâ giep. ²⁸Aregât Yuda luâk âmbâle me Yuda luâk âmbâle bo me luâk kotdâ, me luâk yânŋe, me luâk me âmbâle ye hârok Yesu Kristogāt akmâ kâmot konok manbiâ Anutuŋe yekmâ âmâ dop konok dâm yeŋgonlep. ²⁹Anutuŋe hain dâm yeŋgondo Kristogāt kâmot agigāt Anutuŋe Abrahamgāt den lumbe makmâ kalep den bunŋe yeŋġâlân miawaktâp.

Anutuġāt nan baratluŋe agion.

4 ¹Nengāt agak meme âmâ hin tatâp. Nan baratluŋenŋe nen mombaenân nengāt wan me wan are membai. Gârâmâ

nananyenânbak yân manmai. ²Akto nenñe hoñ bawalupnenñe hin makyenñimaen, “Nan baratlupnenñe damun yeñe akbei.” dâmaen. Hain makyenñim nan baratlupnenñe irawot humomo akbiâ ainâk bâin dâenñe wan me wan are memai. ³Nengât dop hainâk tatâp. Tâmbânñe hannenñande gurukñe manmâ hângât wan me wan yânñe hoñ malañion. ⁴Ye akto nen hain aktenñe Anutuñe bâin dâmân Nanñe huñgun añdo âmbâle siâgât tepñân miawakto mendo Yudagât den kârikñe aregât amukñân malep. ⁵Manmâ luâk âmbâle den kârikñande damunyeñe akmap are Anutugât kâmolân dewatiwai nengât dosa mem den kârikñe damunyeñe akmap a bo agâk dâm dumnennân kilep. ⁶Anutugât Nanñande hain agep aregât ye âmâ Anutugât nan baratlupñe agi. Aregât Anutuñe Nanñaet Heakñe nengât huñgun añdo gem meme aknengimbo ainâk, “Ewenenñe Ewenenñe.” dâenñe kambiamnenñe owâiep. ⁷Aregât gâ hoñ luâk bo manmat. Gâmâ Anutugât nanñe manmat. Hain akmâ nanñe manmâ Anutu biwi âlepñaet akmâ bât samut aregât amboñe gai manmat.

Kotñe siâ bâleñe hamiañion are lâuwânñe bo membaen.

⁸Akto ye ulikñân Anutu bo nânğâmini sop ain hângei den nânğâm siâ siâ yânñe areyengât hoñ bawa akmini. ⁹Akto beirâ Anutuñe yekmâ nânğâyengimbo âmâ ye gai hainâk yâk nânğañi. Hain akmâ âmâ wangât hinñe wan me wan bunñe are hepunmâ âmâ wan me wan bunñe bo akto kârikñe bo are mete katmâ hoñ manañmai? ¹⁰Hain akmâ hombañ keñe keñe aregât nânğâmbiâ bunñe akto tatmai amâ bo ârândân akmap. ¹¹Yeñe hain agi aregât nânñe âi yengât meân are bâliwiapgât dop miawakto kambiamne bâliâp.

Galatia gâtñande Paulo hâkânñe dâm hamiañi.

¹²Galalupne, nâ ulityenñim makbe. Nânñe yengât akmâ wan akman aregât nânğât dop hainâk akbei. Ye ire manmâ gam wan me wan bâleñe siâ bo niñi. ¹³Akto nânñe kundat agân aregât den pat âlepñe pup pup makyenñiân are emelâk nânğâyi. ¹⁴Akto sop ain kundat nugumbo yeñe tân nugum âi humo mem nânğât hâkânñe bo agi. Akto ye añelo me Yesu Kristo hoñ bawa akyenñimai dop hainâk hoñ bawa akniñi aregât wangât hinñe hepun negi? ¹⁵Yei, sop ain makmâ egâlianñe agi are wangât bo aktâp? Ye dewunyeñe koañe kâwutmâ nâ niñbaigât dâp tato dâine niñbâi. Are bunñe nânğâm heñgemgom maktân. ¹⁶Akto nânñe yengât okotne nânğâm aregât den bunñe makyenñiân, aregât wangât gasa akniñdâi? ¹⁷Luâk bikñande yengât ukenñe akmai, amâ bunñe bo akyenñimai. Akto yâk ukenñe akyenñinetgât ye yânñangen katyekmai. ¹⁸Akto luâk are bunñe tân yenguwerrâm akmâ togoyi dâine nânñe tân yenguwiangât dop bo tato heronñe dondâ akbom. Gârâmâ nâ ye olop bo talân. Akto luâk are

hilip yengüwerâm togoyi. ¹⁹Nan baratlupne, nâ yengât akmâ metjande nigimbo hâk hilâlâm nângân areâk totokom nângân. Aregât Kristogât towat yengâlân miawakmâ pagaleâk hâk hilâlâm are nângâm manbian. ²⁰Nâ yengât hanokoak dondâ akmangât yengâlân dowâk togom den makmâ purik gurik akmâ makyengiwerâm akniñdâp.

Sara akto Haga yâk yetgât den ginje.

²¹Galalupne, den kârikje lokowerâm aktâi aregât makyengiwe nângânet. Moseje den kârikje kulempoep are hin tatâp. ²²Are amâ Anutugât denjande hin dâep, “Abrahamgât nanañ lâuwâ miawagiat. Siâ hoj manman âmbâle Haga arekje miep. Dâ siâ Isaka amâ âmbenje bunje Sara arekje miep. ²³Akto hoj manman âmbâle Haga arekje miep are amâ yânnângen miawagep. Dâ âmbenje bunje Sarañe miep Isaka amâ Anutu makmâ hâriepgât dopñân miawagep. ²⁴Akto den aregât bikje hin tatâp, Âmbâle lâuwâ amâ Anutuñe den dewatiakbiandatgât agak meme lâuwâ aregât dopñe agiat. Siâ amâ Sinai gimbanje agakje yâkgât kâmotje amâ hoj manman agi. Aregât dopñe amâ Haganje agep. ²⁵Haga are Sinai gimbanje Arabia hânân tatâp aregât dop. Dâ Yerusalem kipia are Sinai gimbanje olop dopyetje konok aktat. Yâkgât kâmotje hoj manmanâk gai akmai. ²⁶Dâ Yerusalem kipia egon himbimân tatâp arekje amâ Sara âmbenje bunje yâkgât dop kipia arekje amâ memenenje bunje aktâp. ²⁷Anutugât denjande hin dâep,

“Âmbâle gupinje nanañ bo memmat gâ biwi kau nângâwen. Akto nanañ bo memmatgât heronje maronje akben. Nanañlupgande amâ âmbâle luâkdâ yâkgât nanañlupje ewangiwei.” dâep.

²⁸Den are bunje akto nen Anutuñe Abrahamgât nanje Isaka yâkgât den makmâ kalep are nengâlân miawagep.

²⁹Dâ ulikñân nanañ yânnande nanañ bunje Anutugât Wâtgât meme arekje tângombo miawagep are gasa agañep. Dop hainâk hinje aknengimai. ³⁰Aregât Anutugât denjande gain gain maktâp? Hin. Hoj manman âmbâle yâk nanje olop watyelekmenâ ariet. Hoj manman âmbâlegât nanjande âmbâle bunjaet nanje olop bât samut bo membiâp. ³¹Aregât galalupne, nen hoj manman âmbâlegât nanlupje bo. Nen amâ âmbâle bunje yâkgât nanlupje dop agion manden.

Yesuje emelâk tâgânba olojnenegep.

5 ¹Galama, tâk bâlâk mannegât Kristonje hulañ nenegep, aregât bikñande tâgân katyekberâm akbiâ amâ hâkâñ akbei. ²Nâ Paulonje makyengiwe nângânet. Ye hâkgât tirip membiâ amâ Kristonje yengâlân wan me wan yâñje hainare akbop. ³Gaetje totokom makyengiwe. Siâ hâkñân tirip membiapñe den kârikje hârok lokombo ârândân akbiap. ⁴Den kârikje lokom dosa bâlâk manberâm akbiâ amâ ye Kristo olop

dewatiyi are toktâp. Akto han kalem yengâlân bunje bo akbop. ⁵⁻⁶ Akto nenje biwinenje Yesu Kristogâlân kalion nen hâknenne gâi anjiyion akto bo gâi anjiyi nen âmâ kâmot konok akmâ biwinenje Yesugâlân hokboâk hokboâk katmâ hoj bawa aganjmâ okot âlep aganjmaen. Aregât akto Anutugât Heakjande tân nengumbo Yesuje âi miep aregât hâuje âlepne membaen aregâlâk nângâm miawagâk dâm kondenne kambiamnenje sândugem âlepne akmap.

Luâk den hanâk makmai are yengât den bo nângâniâm.

⁷⁻⁸ Galalupne, ye ulikjân den pat âlepne nângâm Yesu hoj bawa aganjbiâ yektere ârândâj agep. Gârâmâ hinje Yuda luâk amon siâne Humonenjande ye olojyekmâ manman âlepnaet dâwân katyegep arekne bo hungunyenjiegip arekne yengâlân togombiâ âmâ denyene dowâk nângâyi aregât pat nângâre bo ârândâj agep. ⁹ Amâ hin. Bau wiye bâlensiâ solân gembo hârok bâlimap. ¹⁰ Akto nâ biwine Humogâlân katmâ manman aregât hin nângân. Ye hinâk nângâwai. Luâk bâleje akyengimap are âgâ âgâne me gegeje bikne Anutuje hâuje waŋdo umatje membiap.

¹¹ Galalupne, nâ tiripdâ akjetgât luâk makyengiman dâine wangât dâtne metne siâ akniñbâi? Hain akman dâine lâwin parânaet nângâm bâli bâli are olop bo akbop. ¹² Yuda luâk arekne hâkyene gâiangim hilip agum gâi anjinetgât nângân.

Yesuje hulaŋ nenegepgât uŋak amâ kotje siâ hanâk bo akbaen.

¹³⁻¹⁴ Galalupne, yeje wan me wangât hoj bawa akmini ainba Anutuje olojyekto âlepjân manmai aregât hâkgât siâ siâ aregât bo ukenje akmâ watbei. Aregât den kâriknaet keinjande hin dâp. Ye yeje aganjimai hainâk luâk siâ aganjbei. Hain maktâp aregât den are lokom yeje hoj bawa aganjim okot âlep aganjim âmâ den kârikne hârok lokowei. ¹⁵ Ye âmâ dâtyenande igiakmâ agu agu dondâ akmâ bo akbâigât sami den makyengiân.

Heakgât den akto manman tâmbânaet den.

¹⁶⁻¹⁷ Galalupne, hâkyenande olojyekto aregâlâk nângâm watbiâ âmâ hâkyenande Anutugât Heakne are mem ge katberâm akto ye wan me wan âlepne memberâm akbai aregât dop bo akbiâp. Aregât hâkyenae bo nângâmbiâ agato Anutugât Heakjande wan me wangât makyengimbo aregâlâk nângâmbiâ âmâ agak meme bâlenjande kambiamyenân heyengimbo are bo nângâm âlepjânâk manbai. ¹⁸ Anutugât Heakne olojyekmâ mem owâne akyengimbo amâ den kârikne arekne luâk kembu bo akyengiwiap.

¹⁹ Galalupne, hâkgât agak meme amâ miapjân tatmap. Amâ hin. Âmbâle mem hepun hepun akto nângâ nângâ bâleje, ukenjaet kotje

siâ siâ, akto bâleŋaet kotŋe siâ siâ, ²⁰akto tukup kotŋe mem agatmai akto kâmbokŋe kârikŋe me sait memai akto galagât hogo hogo, akto galayenġât wan me wangât nânġâmbiâ âġâmap akto kuk hengân aganġimai akto yeŋaelâk nânġâmbiâ âġâmap, ²¹ewangiak gowangiak kakŋân manmai, tu kârikŋe nem gulip akmâ akto sot soŋgo kâmdâk nene akmâ bâleŋe siâ siâ hârok akmai. Akmâ ire gaetŋe makyenġiwe. Agak meme are luâk âmbâle hârokŋe hain akmai amâ Anutuŋe bo damunyene akto Yesugât kâmolân bo dewatiwai. ²²Dâ luâk âmbâle bikŋe Anutugât Heakŋande meme akyenġimbo hin akmai. Anutu akto luâk bikŋe yenġât okotyene akmai, akto Anutuŋe damun nenŋe akmap dâm areġât herone dondâ akbiâ biwiyene sândugemap, akto umatŋe me gasa me wan me wan akberâmbiâ umatŋe miawakyenġimbo âmâ biwiyene kârikŋe tatyenġimbo yaiwâk yaiyenġum manmâ âġâwai. Akto agak meme âlepŋeâk akmâ manmai. Akto wan me wan makmâ katmai areġâlâk nânġâm watmâ manbai. ²³Akto yeŋaet nânġâmbiâ gembo galalupyene yenġât nânġâmbiâ âġâambo tân yenġum manbai. Akto biwiyenande wan me wangât egâlianġo ainâk mem ge katmâ manbai. Luâk âmbâle hain akmai arekŋe den kârikŋande mem ge katyekbiapġât dâp bo tatâp. ²⁴Akto Kristogât pat manmai amâ agak meme tâmbânjeŋe egâlianġ akto bâleŋaet egâlianġ are lâwin parâŋân kombiâ bo agep.

²⁵Anutugât Heakŋande meme aknengimap âmâ benŋe areġât dowâk biwinenŋe yâkgâlân katmâ lauŋe lokowaen. ²⁶Akto galayenġât siâ siâ are ekmâ egâlianġmâ kotŋe gulip bo mem agatbaen. Akto hâknene bo mem agatbaen akto galagât bo mem ge kalanġiwaen.

Gala siâŋe umatŋe lokombo tângowaen.

6 ¹Galalupne, luâk siâŋe yeugem dosa penianġo ye wât meme akmaiŋe biwi sânduk akmâ hainare makmâ miwindik yekbei. Akto gâ gugak bâleŋe akbom dâm yeugewâtġât damunge akben. ²Wan me wan yenġim mem umatŋe mânġi yekmap are anġi goanġi akmâ tân agu aguân membei. Hain akmâ Kristogât den kârikŋe âlepŋe lokowai. ³Luâk siâ wan me wan bo akmâ ikiŋaet nânġâambo âġâwapi hain arekŋe ikiŋaet hanŋe mem agatâp dâwaen. ⁴Areġât siâ ikiŋe agak memene ekmâ nânġânbiâp. Akto egâlianġ den are ikiŋaet akmâ mem miawakbiâp. Luâk anġâ siâġât akmâ bo. ⁵Âiġât umatŋe kâmot kat katŋe are ambonân ambonân lokowaen. ⁶Akto yenġât humomolupyenande Anutugât keiŋe makyenġiwai are wan me wan bo tatyenġimbo âmâ dowâk tânyenġum wan me wan bo tatyenġiwiap are yenġiwei.

Agak memenenŋaet hâuŋe manmâ penianġbaen.

⁷Yeŋe guwuŋ anġiwâiġât ire nânġâwei. Anutuŋe siâ siâ hârok ekmâ nânġâmap areġât luâk âmbâleŋe wan me wan akbiâ âmâ yâk hainâk

akyengimap. ⁸Dâ luâk âmbâleŋe hâkyeŋeâk mem agatbiâ âmâ siân Anutuŋe hâkyeŋe kondo hambuwiap. Dâ luâk âmbâleŋe Anutuġât Heakŋe areġâlâk nâŋġaenŋe âmâ tân nengumbo ain manman âlepŋân manbaen. ⁹Galalupne areġâlâk nâŋġâm âi âlepŋeâk mem luâk âmbâle tân yeŋgum umatŋe miawak nengiwiap me hâknenŋe yeukŋe miawak nengiwiap are hanâk âiâk mem âġâwaen. Nen hain aktenŋe irawot Anutuŋe hâuŋe nengiwiap. ¹⁰Are nâŋġâm âmâ sop nenŋe tatoân hin akbaen. Luâk âmbâle yânŋe umatŋân manbai are tânyenġuwaen. Akto Yesuġât kâmot umatŋân manbiâ are âkâ hainâk hâk hilâlâm kakŋân tânyenġuwaen.

Pauloŋe Yesu lâwinân kombiâ moep areġât den makmâ heronŋe agep.

¹¹Galatia hânân ġâtŋe, kulem esenŋe ire luâk siâ maganġere kulemġoâp. Dâ biken ire âmâ nunak kulemġoân areġât bât tiripne humo ekmâ hin dâwei. Bunŋe kulem ire âmâ Pauloŋe kulemġoep. ¹²Yuda luâk hâkyeŋe ġâi anġinet dâmai arekŋe luâk âmbâle hârokŋe nenekbiâ âġâk dâm hâkyeŋe ġâiŋet dâmai. Akto areâk bo. Yuda siânbaŋe nenguwâirâm Yesu lâwinân moep areġât hamep akmâ Anutuŋe dosayeŋe bo akyenġiâp dâmap areġât den bo makyenġim hâkyeŋe ġâi ġâiġâlâk makyenġimai. ¹³Akto luâk are hâkyeŋe ġâiyi ġârâmâ den kârikŋe bo lokomai areġât Galatia hânân ġâtŋe hâkyeŋe ġâienŋe galalupnenŋande nenekmâ kotnenŋe mem agatbairâm areġât ye hâwâtyekmai. ¹⁴Dâ nâmâ kotne mem agatbaigât bo nâŋġân areġât nâmâ hin nâŋġân. Humonenŋe Yesu Kristo lâwinân kombiâ moep areġâlâk nâŋġare humo akmap. Yâġġât akmâ hânân ġâtŋe wan me wanŋe mendere lâwin parâŋân moniŋep. Akto nâ hainagâk lâwin parâŋân hânân wan me wan are moanġân. ¹⁵Areġât lâuwânŋe makbe. Hâknenŋe ġâi anġiyion me Yuda luâk bo manmai arekŋe bo ġâi anġiyi are amâ yânŋe. Dâ Anutuŋe mem irakŋe ketugu nenekmap areġâlâk nâŋġâman. ¹⁶Hewum horat ain kinmai dopŋân yeŋġâlân biwi limbâp hâtikom yembiâp. Akto Anutuŋe ikiŋe kâmot Israe bunŋe nengâlân olowâk malâk.

¹⁷Galalupne nâmâ Yesuġât hoŋ bawa bunŋe aġanmâ hâk hilâlâm humo nâŋġâm areġât hâknân panda tatâp areġât luâk siânŋe mem ge katnekbiapġât dop bo tatâp.

¹⁸Galalupne, Kembunenŋe Yesu Kristoġât han kalemŋe âlepŋande hanyenġân yem âġâwiâp. A bundâk.